


武編


後四





漢書門		九五四六		
類	號	函	架	冊
		一一一		
		一一一		

漢書		九五四六		
類	號	函	架	冊
		一一一		
		一一一		

內閣文庫			
番號	漢	9546	
冊數	12 (10)		
函號	299	249	







唐荆川先生纂輯武編後卷四目錄

淺草文庫

伴北

闕圍

窮寇

歸師

截歸

疑

先聲

聲

降

退

詭聲

詭形

死戰

乘勝

兩敵

退據

苦戰

敗



攻必救

掩巢

堅壁

摧標

武林姚士純同校

錢塘徐象標梓行

目錄終

唐荆川先生纂輯武編後卷四

瑯琊焦竑校

佯北

戰國秦師伐趙趙奢之子括代廉頗將拒秦於長平
 秦陰使白起為上將軍趙括出兵攻秦軍秦軍佯敗
 而走張二奇兵以劫之趙軍逐勝追造秦壁堅不得
 入而秦奇兵二萬五千人絕趙軍後又一軍五千騎
 絕趙壁間趙軍分而為二糧道絕而秦出輕兵擊之
 趙戰不利因築壁堅守以待救秦王開趙食道絕自
 之河內發卒遮絕救兵趙卒食絕四十六日陰相殺

括與銳卒自搏戰秦軍射殺之趙軍大敗坑卒四十餘萬

東魏侯景叛高澄歸梁圍彭城澄遣慕容紹宗討之將戰紹宗以梁人剽悍恐其衆不能支一一引諸將而誑之曰我當佯退誘吾兒使前決可擊其背申明戒之初景又戒梁人曰逐出不過二里會戰紹宗實敗走梁人不用景言乘勝深入魏人以紹宗之言爲信掩擊遂大敗之

隋薛世雄爲右翊衛將軍竇建德僭稱長樂王遣世雄率兵三萬討之至河間城南營於七里并建德聞世雄至精兵數千人伏河間南界澤中悉拔諸城僞遁去入豆子航中世雄以爲建德果亡乃不設備建德覘知之自率敢死二千人襲擊世雄會雲霧晝晦而兩軍不辨隋軍大潰自相騰藉死者萬餘世雄以數百騎而遁

隋末高祖起兵自太原至霍邑隋將宋老生守城太宗以數騎詣其城下舉鞭指麾若將圍城者老生怒開門出兵高祖因謂隴西公建成曰汝看兩陣將交引左軍直趨東門命太宗引右軍直趨南門以斷其歸路老生之軍背城而列陣高祖以中軍與建成合

陣於城東太宗陣於城南老生麾兵疾進先薄高祖而建城墜馬老生乘之中軍與左軍咸却太宗自南原遙見塵起知義師退率二百騎馳下峻坂殺一賊將遂衝斷其軍出其陣後表裏齊謀隋師大潰遂擒老生而平霍邑

唐姜寶誼武德初爲右武衛將軍時劉武周將黃子英往來雀鼠谷高祖令寶誼擊之子英數以輕兵挑戰寶誼兵纔接子英輕遁如此者再三寶誼悉兵逐之伏兵發軍遂大敗寶誼爲賊所擒

郭子儀討安慶緒渡河圍衛州慶緒率衆來援分三軍子儀陣以待之預選善射者三千人伏於壁內誠之曰候吾小却賊必爭進則登城鼓譟弓弩齊發以逼之旣戰子儀僞退賊果棄之乃開壘門遂聞鼓譟弓弩齊發矢注如雨賊徒震駭因整衆追之賊衆大敗

春秋時齊師伐魯公將戰曹劌請從公與之乘戰于長勺公將鼓之劌曰未可齊人三鼓劌曰可矣齊師敗績公將馳之劌曰未可下視其轍登軾而望之曰可矣遂逐齊師旣克公問其故對曰大國難測也懼有伏焉吾視其轍亂其旗靡故逐之

闕圍

後漢初張步據齊地漢將耿弇總兵討之步使其大將費邑軍歷下又分守祝阿鍾城弇先擊祝阿自旦攻城未日中而拔之故開圍一角令其衆得奔歸鍾城鍾城人聞祝阿已潰大恐懼遂空壁亡去

建武中妖賊单臣等相聚入原武劫掠吏民自稱將軍臧官將數千人圍之賊食多數攻不下士卒死傷帝召公卿諸侯問方畧明帝時爲東海王對曰妖巫相劫勢無久立其中必有悔欲亡者但外圍急不得出耳小緩之令得逃亡則一亭長足以擒矣帝然之

卽勅令撤圍緩守賊衆分散遂拔原武斬单臣等將軍朱雋與荊州刺史徐璆共討黃巾擊賊帥趙弘斬之餘賊韓忠據宛乞降不許司馬張超請聽之雋曰兵有形同而勢異者昔秦項之際人無定主故賞降附以勸來耳今海內一統唯黃巾造寇納降無以勸善討之足以懲惡今若受之更開逆意賊利則進戰鈍則乞降縱敵長寇非良計也因急攻之連戰不尅雋登土山視之顧謂張超曰吾知之矣賊今外圍周固內營迫急乞降不受欲出不得所以死戰也萬人一心猶不可當況十萬乎其害甚矣今不如撤圍并

兵入城忠見解圍勢必自出出則意散易破之道也
既而解圍忠果出戰雋因擊大破之忠等並降
韓世忠時勝捷軍張師正敗宣撫司使李彌大斬之
大校李復鼓衆以亂淄青之附者合數萬人山東復
擾彌大檄世忠將所部追擊至臨淄河兵不滿千分
爲四隊布鐵蒺藜自塞歸路令曰進則勝退則死走
者命復隊勦殺於是莫敢返顧皆死戰大破之斬復
餘黨奔潰乘勝逐北追至宿遷賊尚萬人方擁子女
椎牛縱酒世忠單騎夜造其營呼曰大軍至矣亟束
戈卷甲吾能保全汝功名賊駭慄請命因跪進牛酒

下馬解鞍飲啖之盡於是衆悉就降黎明見世忠軍
未至始大悔失色

曹操克袁讓圍壺關下令曰城拔皆坑之連月不下
曹仁言於操曰圍城必示之以活門所以開其生路
也今公告之必死將人自爲守且城固而糧多攻之
則士卒傷守之則引日久今頓兵堅城之下攻必死
之虜非良計也太祖從之坑遂降
後魏末高歡起義兵於河北爾朱兆等諸將同會鄴
南士馬精強號二十萬圍歡於韓陵山是時歡馬二
千步卒不滿三萬人兆等設圍不合歡爲圓陣連繫

牛馬盧自塞之於是將士死戰四面奮擊大破兆等

窮寇

漢趙充國討先零羗羗久屯聚解弛忽覩大軍奔輜重欲渡湟水道阨狹充國徐行驅之或曰逐利行遲充國曰窮寇也不可迫緩之則走不顧急之則還致死諸將皆曰善虜衆果赴水溺死者百數於是大破賊衆

後梁呂光遣二子紹纂伐段業南涼禿髮烏孤遣其將楊軌救業紹以業等軍盛欲從三門關挾山而東纂曰挾山示弱取敗之道不如結陣衝之彼必憚我

而不戰也紹乃引軍而南業將擊之其祖沮渠蒙遜諫曰楊軌恃虜騎之強有窺伺之心紹纂兵在死地必決戰求生不戰則有大山之安戰則有累卵之危業曰卿言是也乃按甲兵不戰紹亦難之各引兵歸高齊北豫州刺史馬消難請降於周周遣楊忠達奚武等率騎士五千迎之從間道馳入齊境五百里前後三遣使報消難皆不返去虎牢三十里武疑有變欲還忠曰有進死無退生獨以千騎夜趣城下城四面峭絕但聞擊析聲武親來麾數百騎西去忠勒餘騎不動侯門開而入馳遣召武齊鎮城將伏敬遠勒

甲士二千人據東埤舉烽嚴警武憚之不欲保城乃多取財帛以餌消難及其屬先歸忠以三千騎為殿到洛陽皆解鞍而卧齊眾來追至洛北忠謂將士曰但飽食今在死地賊必不敢渡水當吾鋒食畢齊師佯若渡水忠馳騎將擊之齊兵不敢逼遂徐引而還狄青嘗與虜戰大勝追奔數里虜忽壅遏山嶠知其前必遇險士卒皆欲奮戰青遽鳴鉦止之虜得引去驗其處果臨深澗將佐悔不擊青獨曰不然奔命之虜忽止而拒我安知非謀軍已大勝殘寇不足利得之無所加重萬一落其術中存亡不可知寧悔不擊

不可悔不止

歸師

劉項爭天下之際漢王至南鄭諸將及士卒皆歌思東歸韓信說漢王曰項王王諸將之有功者而王獨居南鄭是遷也軍吏士卒皆山東之人也日夜跂而望歸及其鋒而用之可以有大功天下已定民皆自寧不可復用

曹操圍張繡於穰劉表遣兵救繡以絕軍後操將引還繡兵來追操軍不得進連營稍前到安眾繡與表兵合守險操軍前後受敵操乃夜鑿險為地道悉過

輜重設奇兵會明賊謂操爲遁也悉軍來追乃縱奇
兵步騎夾攻大破之操謂荀彧曰虜過吾歸師與吾
死地戰是以知勝

宋建武初魏圍鍾離張欣泰爲軍主隨崔慧景救援
及魏軍退而邵陽洲上餘軍萬人求輸馬五百疋假
道慧景欲斷路攻之欣泰說慧景曰歸師勿遏古人
畏之兵在死地不可輕也慧景乃聽之過

前秦苻堅征晉至壽春兵敗還長安慕容泓起兵于
華澤堅命苻叡討之叡勇果輕敵不恤士衆泓聞其
至也懼率衆將奔關東叡驅兵邀之姚萇諫曰鮮卑

有思歸之心宜驅令出關不可遏也叡弗從戰于華
澤叡敗績被殺

夏赫連勃勃伐禿髮傉檀大敗之驅掠二萬餘口牛
馬羊數十萬而還傉檀率衆追之其將焦殷曰勃勃
御軍齊肅未可輕也今因抄掠之資率思歸之士人
自爲戰難與爭鋒不如從温圍北渡趣萬解堆阻水
結管制其咽喉百戰百勝之術也傉檀不從勃勃聞
而大喜乃於陽武下峽鑿陵埋車以塞路勒衆逆擊
傉檀大敗之殺傷萬計

後梁呂弘攻段業於張掖不勝將東走業議欲追擊

之其將沮渠蒙遜諫曰歸師勿遏窮寇勿追此兵家之戒不如縱之以爲後圖業曰一日縱敵悔將無及遂率衆追之爲弘所敗

截歸

後漢涼州賊王國圍陳倉不拔而去將軍皇甫嵩進兵擊之董卓曰不可兵法窮寇勿遏歸衆勿追今我追國是迫歸衆追窮寇也困獸猶鬪蜂虿有毒況大衆乎嵩曰不然前吾不擊避其銳也今而擊之待其哀也所擊疲師非歸衆也國衆且走莫有鬪志以整擊亂非窮寇也遂獨進擊之使卓爲後拒連戰大破

之斬首萬餘級國走而死

唐馬燧討田悅軍中乏糧悅深壁不戰燧令諸軍持十日糧進次滏口與悅夾洹水而軍李抱真與李芄問曰糧少而深入何也燧曰糧少利速戰兵法善于致人不致於人今田悅與恒州淄青三鎮爲首尾計欲不戰以老我師若分兵擊其左右悅必救之則我腹背受敵戰必不利故進軍逼悅所謂攻其所必救也彼苟出戰必爲諸軍破之燧乃造三橋道逾洹水自挑戰悅不敢出恒州兵以軍少懼爲燧所并乃引軍合于悅悅謂燧明日復挑戰乃伏兵萬人欲邀燧

燧乃令諸軍半夜皆食先鷄鳴時擊鼓吹角潛傍洹水徑趨魏州令曰聞賊至則止爲陣又令百騎鳴鼓吹角皆留于後仍抱薪持火待軍畢發止角匿其旁伺悅畢渡焚其橋軍行十數里悅乃率淄青恒州步騎四萬人喻橋掩其後乘風縱火鼓譟而退燧乃坐甲令無動命前除草斬荆棘廣百步以爲陣燧出陣募勇士得五千餘人分爲前部以俟賊至比悅軍至則火止力少衰乃縱軍擊之悅軍大敗悅走橋橋已焚悅軍亂赴水斬首一萬

前漢高帝匈奴圍於平城七日高帝使使問厚遺闕

氏乃開圍一角於是高帝令士皆持滿傳矢外嚮從解角直出得與大軍合冒頓引兵去

後周大將宇文護伐齊遣將尉遲迴圍洛陽爲敵所敗周將達奚武與齊王憲於邙山禦之至夜收軍憲欲待明更戰武欲還固爭未決武曰洛陽軍散人情駭動若不因夜速還明日欲歸不得武在軍旅久矣備見形勢大王少年未經軍事豈可將數營士衆一朝棄之乎憲遂從之全軍而返齊人弗悟而不追若追之必克也

宋太宗時契丹與西賊相結窺邊上密授成算於府

州折御卿使爲之備至是虜將韓德威萬餘衆誘黨
項勒浪等族自振武入寇御卿大敗之於河又勒浪
等族乘虜之亂詐爲府州兵躡其後虜衆死者十六
七奏至上召其使問狀因笑謂左右曰北虜小醜輕
進易退常戒邊將勿與爭鋒待其深入卽分奇兵斷
其歸路從而擊之必無遺類果如我言左右呼萬歲
因遣內侍往圖地形觀之其勒浪等族旣與虜有隙
悉欵塞內附

五代黃文靖佐葛從周

入潞會晉軍十餘萬俯

外垣砦文靖慮孤軍難守乃與從周啓闈出師文靖

爲殿後命矢刃皆外向持重而還晉人不敢逼

魏傅永爲豫州刺史南齊將裴叔業來侵楚王戍永
令填塞外塹夜伏戰士一千人於城外及曉而叔業
等至頓於城東列陣將置長圍永所伏兵於道左擊
其後軍破之叔業乃令將佐守所列之陣自率精甲
數千人救之永上門樓觀叔業南行五六里許便開
門奮擊遂推破之叔業奔走左右欲追永曰弱卒不
滿三千彼精甲猶盛非力屈而敗直墮吾計中耳旣
不測我之虛實足喪其膽俘此足矣何還追之

疑

後漢廉范爲雲中太守會匈奴大入塞范自率士卒拒之虜衆盛不敵會日暮令士各交縛兩炬三頭然火虜遙見火多謂漢救兵至待朝將退范令軍中蓐食晨往擊之斬首數百級虜自此不敢向雲中

陳登守廣陵孫策遣軍攻登于康琦城登使人求救於曹公而密去城十里軍營處所多取柴薪兩束一聚相去十步縱橫成行令俱起火互然其聚城中稱慶若大軍到賊覩火驚潰登勒兵追奔斬首萬級秦符堅陷襄陽晉將桓冲攻之堅將慕容垂等率兵步騎五萬攻襄陽以石越爲前鋒次于沔水垂越夜

命三軍人持十炬火繫炬於木枝光照數十里冲懼退還上明

宋晉安王子勛舉兵反潯陽遣臨川內史張淹自鄱陽嶠道入三吳明帝命將討之時朝廷器甲悉充南討故軍容寡闕乃編椶皮爲馬具裝折竹爲寄生夜舉火進軍賊望見恐懼未戰而走

後魏雍州刺史蕭寶寅據州反魏大將長孫雉討之軍次弘農副將楊偁曰昔魏武與韓遂馬超挾關爲壘勝負之理久而未決豈才雄相類算略抗衡當以河山險阻難用智力今賊守潼關全據形勢縱曹操

復出亦無所逞奇必須取蒲坂飛棹西岸置兵死地
人有鬪心潼關之賊必睹風而散諸處旣平長安自
克雉曰賊黨薛循義已圍河東薛風賢又保安邑雖
有此計猶用爲疑侃曰河東治在蒲坂西帶河湄所
部之人多在東境循義駟率壯勇西圍郡邑父老妻
弱尚保舊村若步卒一臨方寸各亂人人思歸則郡
圍自解不戰而勝昭然在目雉從之令其子彥等領
騎與侃於弘農北度所統悉是騎士習於野戰未可
攻城便據石壁侃乃班告曰今且停軍於此以待步
卒兼觀人情向背然後行若送降名者各自還村候

臺軍舉烽火亦應之以明降款其無應之者卽是不
降之村理須殄戮賞賚軍士人遂傳相輿告報未實
降者亦詐舉烽一布之間火光遍數百里內寶寅將
時圍河東不測所以各自散歸長安賊平侃頗有
西魏將宇文測行綏州事每歲河水合後突厥卽來
寇掠先是常先遣居人入城堡以避之測至皆令安
堵如舊乃於要路數百處多積柴仍遠斥候伺其動
靜是年十二月突厥從連谷入寇去界數十里測命
積柴之處一時縱火突厥謂有大軍至懼而遁走自
相蹂踐委棄雜畜及輜重不可勝數測徐率所部收

之分結百姓自是突厥不敢復至

唐永王璘拒命肅宗使中官啖延宗招討之判官李
銑以廣陵步卒三千同出于瓜步洲廣張旗
幟耀乎江津璘登埤望之竟日始有懼色其夕銑令
多燒火人執兩炬以疑之隔江望者兼水中之影一
皆爲二璘軍人以火應之璘懼以爲官軍悉濟矣遂
以兒女及麾下霄遁

春秋時楚子儀之亂析公奔晉晉以爲謀主繞角之
役析公曰楚師輕窳易震蕩也若多鼓鈞聲以夜軍
之楚師必遁晉人從之楚師宵潰

唐王峻爲朔方副總管吐蕃精甲十萬寇臨洮峻率
步兵二千卷甲倍程與臨洮軍合峻出奇兵七百人
在蕃後夜襲之去賊五里置鼓角令前者遇賊大呼
後者擊鼓賊大懼疑有伏兵自相殺者萬計

晉侯伐齊齊侯登巫山以望晉師晉人使司馬斥山
澤之險雖所不至必旆而疏陳之使乘車者左實右
僞以旆先輿曳柴而從之齊侯見之畏其衆也乃脫
歸

曹休與孫權兵戰休敗權追兵斷夾石諸將不知所
出賈逵曰休敗于外進不能戰退不能還安危之機

不及終日賊以軍無後斷故至此今疾進出其不意
所謂先人以奪其心賊見吾兵必走乃兼道進軍多
設旗鼓爲疑兵賊見遂退

魏將軍曹爽襲蜀將劉敏王平鎮漢中拒之或謂
但可守城不出拒敵敵必自引退敏以爲男女布野
餘糧栖畝若聽之入則大事去矣遂帥所領與平據
形勢多張旗幟亘百里會費禕至軍退

東晉末桓玄篡晉劉裕起義兵討之玄使將桓謙屯
覆舟山裕先使羸弱登蔣山多張旗幟以油帔冠諸
木杪徧滿山谷玄不之測大懼裕乃與劉毅等分數

隊進突謙陣皆殊死戰無不以一當百時東北風急
毅軍放火烟塵漲天鼓譟之聲震駭京邑謙軍一時
奔散

後魏幽州刺史孫定兒據州不下衆數萬宇文泰令
劉亮襲之定兒以義兵猶遠未爲備亮乃將三十騎
先置一燾於近城高嶺卽馳入城定兒方高會卒見
亮至衆皆駭愕亮乃麾兵斬定兒縣首州門號令賊
黨仍遙指城外燻命二騎曰出追大軍賊黨恐懼一
時降服

隋煬帝爲突厥所圍郡縣皆發兵赴援時唐太宗年

未弱冠召募從軍隸屯衛將軍雲定興師將發太宗
勸之多齎鼓旗設疑兵以威突厥定興不納太宗謂
之曰始畢掃其境內敢圍天子本疑國家倉卒無援
忽見旗鼓之盛必謂救兵雲集今者進師可前後相
次數十里間連亘不絕晝則旛旗夜則金鼓相應以
張形勢則必見懼望塵而退此計之上也不然爲彼
所輕悉軍來戰公必不能支矣定興從焉將次崞縣
突厥候騎馳告始畢曰兵大至矣遂解圍而退果如
所料

宋開寶中伐金陵王師自荆渚乘戰艦而下以黃州

刺史王明領戰艦爲江路巡檢僞將朱令贇自湖口
領兵十五萬連大艦沿流而下將焚采石浮梁直抵
金陵爲援明請益舟師以襲令贇上曰非應急之策
也令贇朝夕至金陵之圍解矣乃密遣人諭明於州
浦間多立長木若帆檣之狀令贇望見果疑我師襲
其後逗留不進移檄諸軍生擒令贇

後魏葛榮舉兵向京師衆號百萬相州刺史李神雉
閉門自守爾朱榮率精騎七千人馬皆有副倍道兼
行東出塗口與葛榮遇衆寡非敵葛榮聞之喜乃令
其衆辨長繩曰至便縛取之自鄴以北列陣數十里

翼張而進榮潛軍山谷爲奇兵分督將以上三人爲一處處有數百騎令所在揚塵鼓譟使賊不測多少又以人馬逼戰刃不如棒密勒軍士馬上各齎棒一枚置於馬側至戰時不聽斬級以棒擊之而已慮廢應援乃分命壯勇所當衝突榮身自陷陣出于賊後表裏合擊大破之於陣擒葛榮餘衆悉降

隋楊義臣爲朔州總管煬帝卽位漢王諒作亂代州總管李景爲漢王將喬鍾葵所圍詔義臣救之義臣自以兵少悉取中軍牛驢得數千頭復令兵數百人持一鼓潛驅之出其不意義臣晡後與鍾葵戰兵

初合驅牛驢者疾進一時鳴鼓塵埃漲天鍾葵軍不知所爲伏兵發因而大潰縱擊破之

後漢虞詡爲武都太守討叛羗羗率衆數千遮詡於陳倉嶠谷詡停軍不進宣言上書請兵須到乃發羗聞之乃分掠旁縣詡因其兵散日夜進道兼行百餘里令吏士各作兩竈日增倍之羗不敢逼旣到因設伏于淺水掩擊大破之

魏文帝至廣陵吳人大駭乃臨江爲疑城自石頭至于江乘架以木幹衣以葦蓆加采石焉一夕而成魏人自江西望甚憚之遂退軍

吳孫堅少時與父共載船至錢塘會海賊掠取賈人財物方於岸上分之行旅皆住船不敢進堅謂父曰此賊可擊請討之父曰非爾所圖也堅行操刀上岸以手東西指麾若分部人兵以邏遮賊狀賊望見以為官兵捕之即委財物散走堅追斬得一級而還後周齊王憲大舉伐齊憲為前鋒守雀鼠谷時陳王純屯千里徑宇文椿屯鷄棲原宇文盛守汾水關并受憲節度憲密謂椿曰兵者詭道汝今為營不須張幕可伐栢為菴示有處所令兵去之後賊猶致疑時齊主分軍萬人向千里徑又令其衆出汾水關自率

大兵與椿對宇文盛馳告急憲自救之齊人遽退盛逐之多有斬獲俄而椿告齊衆稍逼憲又救之會被勅追還率兵夜返齊人果謂栢菴為帳幕不疑軍退翌日始悟

阿木軍還宋兵邀襄樊間阿木乃自安陽濟江留精騎三千陣牛心嶺復立虛寨設疑兵是夜敵果至斬首萬餘級魏將田豫率兵追擊鮮卑單將銳卒深入虜庭胡人衆多鈔軍前後斷絕歸路豫乃進軍去虜衆十餘里結屯營多聚牛馬糞燃之從他道引去胡見煙火不絕以為尚在行數十里乃知之

後梁劉鄩圍晉陽將還戒衆曰有病者殺而焚之三軍咸稱不病乃退因選精卒殿後徐而退之至會關留數馬及旌旗虛設于高岡之上晉人疑有伏兵遂不敢追時服其謀

劉鄩拒晉以晉兵盡在魏州晉陽必虛欲以奇計取之乃潛引兵自黃澤西去晉人怪鄩軍數日不出寂無聲迹遣騎覘之無斥候者城中亦無烟火但鳥止於壘上時見旗幟循堞往來晉王曰我聞劉鄩用兵一步百計必詐也更使覘之乃縛旗於芻僞之上使驢負之循堞而行得城中羸老者詰之云軍已去二

日矣旣而有人自鄩至者言剽兵已趣黃澤晉王發騎追之

時江南東道轉運副使曾昇奏訪聞方臘賊徒雖多全少器械惟以人衆爲枝本路所遣官兵各持器械而賊徒獨以數百人前後奮拳輒困官兵童子婦人在前飾以丹黛假爲妖怪以驚我師復在巢穴四面設險陰爲陷穽又爲長人服火衣作關機以動止執矛戟旗幟飾以丹黛爲鬼神之貌以惑官兵皆不足畏必得熟知道路之人詔劄與童貫譚積自此賊情漸虛官兵始知所向以至擒殄

開禧用兵諸將皆敗唯畢再遇數有功敵常以水櫃
敗我再遇夜縛藁人數十衣以甲冑持旗幟戈矛儼
立成行昧爽鳴鼓敵人驚視亟放水櫃旋知其非真
也甚沮乃出師攻之敵大敗又嘗引敵與戰且前且
却至于數四視日已晚乃以香料煮黑豆布地上復
前搏戰佯爲敗走敵乘勝追逐其馬已饑聞豆香皆
就食鞭之不前我師反攻之敵人死者不勝計又嘗
與敵對壘度敵兵至者日衆難與爭鋒一夕拔營去
慮來相追乃留旗幟於營并縛生羊置其前二足於
鼓上擊鼓有聲敵不覺其爲空營復相持竟日及覺

欲追則已遠矣近時流州蠻叛荆湖制司遣兵討之
蠻以竹爲箭傳以毒藥略着人肉血濡縷無不立死
官軍畏之莫敢前乃祖再遇之智裝束藁人羅列焜
燿蠻見之以爲官軍萬矢俱發伺其矢盡乃出兵攻
之直擣其穴一戰而平

後趙將石虎領兵救陳川爲祖逖所敗兵掠豫州留
將桃豹守譙城居西臺逖與豹共處一城賊從南門
出入放牧逖軍開東門相守四旬逖以布囊盛土如
米狀使千餘人運上臺又使數人擔米僞爲疲極而
息於道賊果逐之皆棄擔而走賊旣獲米謂逖衆豐

集解正統 卷之四
飽而胡戍饑久益懼無復膽氣

宋檀道濟都督征討諸將事與魏軍三十餘戰多捷軍至歷城以資運竭乃還卒有降魏者具說糧食已罄於是士卒憂懼莫有固志道濟夜唱籌量沙以所餘少米散其上及旦魏軍知資糧有餘故不復追以降者爲妄斬以徇時道濟兵寡弱軍中大懼道濟乃命軍士悉去甲身白服乘輿徐出外圍魏軍懼有伏不敢逼乃歸道濟雖不尅定河南全軍而返

漢景帝時匈奴大入上郡天子使中貴人從李廣勒兵擊匈奴貴人將十騎出獵見匈奴三人與戰被射

傷中貴人走廣廣曰必是匈奴射鵠者也廣乃使百騎往馳三人令其騎張左右翼而廣身射被三人殺其二人生得一人果射鵠者也遙見匈奴有數千騎見廣以爲誘騎驚上山陣廣所從百騎皆大恐欲馳還走廣曰吾去大軍數十里今若走匈奴追射我立盡若我留匈奴必以爲大軍之誘必不敢擊我廣令諸將曰前未到匈奴陣二里所止皆下馬解鞍其騎曰虜多且近卽有急柰何廣曰彼虜以我爲走今皆解鞍示不走用堅其意胡騎遂不敢擊有白馬將出護其兵於是廣上馬與十餘騎奔射殺之復還其騎

中解鞍令士皆縱馬卧是時會暮胡兵終怪之卒不敢擊向夜半時胡兵以爲漢有伏軍於旁皆引兵去詰朝廣乃歸其大軍

曹操軍臨漢中蜀將趙雲將數十騎輕行卒與操大軍遇遂前突其陣且鬪且却操軍追至營雲更大開門偃旗息鼓操兵疑有伏引去

蜀諸葛亮屯陽平遣魏延并兵東下亮惟留萬人守城魏將司馬懿率二十萬衆拒亮而與魏延軍相錯徑前六十里偵候白懿說在城中兵力弱將士失色亮是時意氣自若勒軍中皆偃旗赴鼓不得出菴幔

開四門掃地却灑懿疑其有伏於是引軍北趣山亮謂叅佐曰司馬懿謂吾有疆伏循山走矣候邏還白如亮所言懿後知深以爲恨

南齊將馮道根守阜陵理城隍遠斥候有如敵將至者衆頗笑之道根曰怯防勇戰此之謂也理城未畢會魏將率兵二萬奄至城下道根塹壘未固城中衆少衆皆失色道根命開門緩服登城選精銳二百人出與魏將戰敗之

魏將于謹嘗帥輕騎出塞覘候屬鐵勒數千騎奄至謹以衆寡不敵退必不免乃散衆騎使匿從薄間又

遣人升山指麾若部分軍衆者鐵勒望見雖疑有伏
兵旣恃其衆不以爲慮乃進軍逼謹謹嘗乘駿馬爲
紫駒賊先所識乃使二人各乘一馬突陣而出賊以
爲謹也皆爭逐之謹乃率餘軍擊追賊遂奔走因得
入塞

前梁張重華以謝艾爲軍師率騎三萬進軍臨河後
趙石季龍將麻秋以三萬衆拒之艾乘輅車冠白帽
鳴鼓而行秋望而怒曰艾年少書生冠服如此輕我
也命黑稍龍攘三千人馳擊之艾左右大擾或勸艾
乘馬艾不從乃下車據胡床指麾處分賊以爲有伏

發也懼不敢進又遣將緣河截其後秋軍乃退艾乘
勝奔擊遂大敗之

西魏宇文泰與東魏高歡戰于印山趙貴爲左軍若
于惠爲右軍歡兵萃左軍趙貴等戰不利會日暮歡
進兵攻惠惠擊之皆披靡至夜惠引去歡騎復來追
之惠徐下馬顧命厨人營食食訖謂左右曰長安死
此中死有以異乎乃建旗鳴角收敗軍徐還歡追騎
憚惠疑有伏兵不敢逼

唐吐蕃陷瓜州王君奭死河西恟懼以張守珪爲瓜
州刺史領餘衆方復築州城賊又暴至畧無守禦之

具守珪曰彼衆我寡又創痍之後不可以矢石相持
須以權道制之乃於城上置酒作樂以會將士賊疑
城中有備不敢攻城而退守珪總兵擊敗之
宋將雷有終終討蜀賊李順進至廣安軍軍壘瀕江
三面立柵會夜陰晦賊衆奄至鼓譟舉火士伍恐懼
有終安坐櫛髮氣貌自若賊旣合圍有終引奇兵出
其後擊之賊衆驚擾赴水死者無算

先聲

漢王遣韓信破陳餘後信募致廣武君李左軍師事
之韓信曰僕欲北攻燕東伐齊若何而有功對曰今
將軍涉西河虜魏王豹一舉而下井陘不旬朝破趙
二十萬衆名聞海內威振天下此將軍之所長也然
而衆勞卒罷其實難用今將軍欲舉捲弊之兵頓之
燕堅城之下欲戰恐久力不能拔情見勢屈曠日糧
竭而弱燕不服齊必拒境以自彊燕齊相持而不下
則項之權未有所分也若此者將軍之所短也臣聞
善用兵者不以短擊長而以長擊短爲將軍計莫如
案甲休兵鎮撫其孤百里之內牛酒日至以饗士大
夫醪兵北首燕路而後遣辨士奉咫尺之書暴所長
於燕燕必不敢不聽從燕已從使者東告齊齊必從

風而服雖有智者亦難爲齊計矣如是則天下事可圖也兵固有先聲而後實者此之謂也韓信並從之燕齊從風

魏鄧艾旣平蜀言於司馬昭曰兵有先聲後實者今因平蜀以乘吳吳人震恐席卷之時也然大舉之後將士疲勞不可使用且徐緩之煮鹽興冶爲軍農要用並作舟船然後發使告以利害吳必歸化可不征而定也會艾誅不果行

聲

春秋晉侯伐齊齊侯禦諸平陰塹防門而守之廣里

晉將范宣子告齊大夫析文子曰吾知子敢匿情乎魯人莒人皆請以車千乘自其鄉入旣許之矣若入君必失國子盍圖之子家以告公公恐晏嬰聞之曰君固無勇而又聞是弗能久矣齊師夜遁

趙石勒荊州監軍郭敬寇晉襄陽勒驛令敬退屯樊戒戒之使偃藏旗幟寂若無人彼若使人觀察則告之曰自愛堅守後七八日大軍將至相禁不復得走敬使人浴馬于津周而復始晝夜不絕偵諜還晉南中郎將周撫以爲勒大軍至懼而奔於武昌敬遂入襄陽

梁雍州刺史嶽陽王蕭詧雖稱藩於西魏而尚有二
心西魏將楊忠自樊城觀兵於漢賓陽旗遞進實騎
二千詧登樓覩以爲三萬懼而服焉

後唐將李存審初爲都指揮使梁太祖北伐至棗疆
存審以騎兵三千屯於趙州初梁君聲言五十萬存
審以兵少不敵心頗憂之謂裨將趙行實曰但得老
賊在東別將西來尚可從容畫策不旬日楊師厚攻
棗疆賀德倫寇薊縣攻城甚急存審謂趙行實曰吾
王方事北面南鄙之事付我等數人今西道無兵薊
縣危急我等坐視其弊何以自安老賊旣不下薊城

必西寇深冀不預爲方畧則滋蔓難圖與公等輕騎
而行觀其所向乃選精騎八百急趣信都扼下博橋
道存審令史建塘李嗣肱分兵拒守建塘分麾下五
百騎爲五軍一軍之衡水一軍之南宮一軍之信都
一軍之阜城自將一軍深入各命俘賊討芻糧者十
人而會於下博橋期曰諸軍所至遇梁軍之樵芻者
數百人皆殺之留數人斷臂縱去曰爲我語朱公晉
王大軍至矣時梁祖引師厚兵就德倫共攻薊縣始
至縣西未及置營嗣肱建塘各領百餘騎爲賊旗幟
服色與芻糧者相雜而行至暮及賀德倫營門殺其

門者縱火大呼俘斬而旋其芻蕘者斷手臂得歸皆
言唐兵大至梁祖大駭遂命夜遁

後漢末劉備遣將吳蘭屯下邳曹公遣曹洪征之備
遣張飛屯固山欲斷軍後衆議狐疑洪曰賊實斷道
當伏兵潛行今反張虛聲此其不能也宜及其未集
縱擊蘭蘭破則飛必走乃集兵擊蘭大破之飛果走
劉裕率兵伐南燕慕容超走廣固且乞師於秦裕築
圍守之秦王姚興遣使告裕云慕容氏相與鄰好又
以窮告急今當遣鐵騎十萬徑據洛陽晉軍若不退
者使當長驅而進裕乃呼興使者謂曰語汝姚興我

滅燕之後息甲三年當平關洛今能自送便可速來
劉穆之後聞興使馳入見裕而秦使已去裕以興所
送并答語示穆之穆之尤之曰常日事無大小必同
與謀此宜善詳云何率爾便答此語未能威敵適從
彼怒耳若燕未可拔興救奄至不審何以待之裕笑
曰此是兵機非卿所解故不語耳夫兵貴神速彼若
審能遣救必畏我知寧容先遣信命此是其見我伐
燕內已懷懼自彊之辭耳興果不出師廣固終拔擒
慕容超平齊地

宋雍州刺史袁顛舉兵及泝流入鵲尾與官軍相持

既久軍主張興世越鵲尾上據錢溪顛黨劉胡攻之
不下遣人傳唱錢溪已下官軍並懼沈攸之曰不然
若錢溪實敗萬人中要應有逃亡得還者必是彼戰
失利唱空聲而以惑衆心耳勒軍中不得輒動錢溪
捷報尋至果大破賊攸之悉以錢溪所送胡軍耳鼻
示之顛駭懼急追胡還遂敗之

降

戰國燕軍大破齊國齊將田單守卽墨知士卒可用
乃身操板插與士卒分功妻妾編行伍之間盡散飲
食饗士令甲卒皆伏使老弱女子乘城遣約降於燕

燕軍皆呼萬歲田單又收民金得千鎰令卽墨富豪
遣使遺燕將書曰卽墨卽降願無掠虜吾族家妻妾
令安堵燕將大喜許之燕軍由此益懈田單出軍一
大敗之

項羽圍滎陽漢王請和割滎陽以西者爲漢以東者
爲楚亞父勸項王急攻滎陽漢王患之紀信曰事急
矣臣請誑楚可以間出於是陳平夜出女子東門二
千餘人楚因擊之紀信乃乘王車黃屋左纛曰食盡
漢王降楚軍皆呼萬歲之城東觀以故漢王得與數
十騎出西門逃遁

曹操入荊州劉琮降得水軍步兵十萬孫權與操遇於赤壁部將黃蓋曰今寇衆我寡難與持久觀操方連船艦首尾相接可燒而走也乃先書報欲降曹軍吏士皆引頸相望指言蓋降蓋放諸船同時發火時風猛烟焰漲天人馬燒溺死者甚衆

晉將李矩守滎陽城前趙劉聰將劉暢步騎三萬討矩屯于韓王故壘相去七里遣使招矩時暢卒至矩未暇爲備遣使奉牛酒詐降于暢潛匿精勇見其老弱暢不以爲虞大饗染師人皆醉飽矩謀夜襲之暢僅以身免

周魴爲鄱陽太守被命密求山中舊族名帥爲北敵所聞知者今詭挑魏揚州牧曹休魴答恐民帥小醜不足仗任事或漏泄不能致休乞遣親人齎牋七條以誘休且曰今使君若從皖道進任江上魴當從南對羊歷口爲應未到江岸可住百里土令此間民知北軍在彼卽自善也此間民非苦饑寒而甘兵寇苦於征討樂得北屬但窮困舉事不時見應尋受其禍耳如使清徐諸軍首尾相銜牽綴彼兵使不得速退者則善之善也魴生於江淮長於時事見其便利百舉百捷時不再來敢布腹心休果信魴帥步騎十萬

輜重滿道徑來入皖鮐亦合衆隨陸遜橫截休休幅
 裂瓦解所獲萬計鮐初建密計時頻有郎奉詔諮問
 諸事鮐乃詣部郡門下因下髮謝故休聞之不復疑
 慮事捷振旅帝大會諸將歡飲酒酣謂鮐曰君下髮
 載義成孤大事君之功名當書之竹帛加裨將軍賜
 壽關內侯

後魏崔延伯既破秦賊乃與蕭寶寅率衆會於安定
 甲卒十二萬鐵馬八千疋軍盛甚盛時万侯醜奴置
 營涇州西北七里當元城時或輕騎暫來挑戰大兵
 未交便爾奔北延伯矜功負勝遂唱議先驅伐木別

造大排內爲鎖柱教習強兵負而趨走號爲排城戰
 士在外輜重居中自涇州緣原北上衆軍將出未戰
 之間有賊數百騎詐持文書云是降簿乞且緩師寶
 寅延伯謂其事實遂巡未鬪俄而宿勒明達率衆自
 東北而至乞降之賊從西競下諸軍前後受敵延伯
 兵力疲乏賊乃乘間得入排城延伯軍大敗
 西魏宇文泰與東魏高歡戰於邙山泰軍不利裨將
 于謹卒其麾下僞降立於路左歡乘勝逐北不以爲
 虞追騎過盡謹乃自後擊之敵人大駭獨孤信又收
 集兵士於後突擊歡軍亂以此西魏得全而退

唐史思明陷洛陽賊鋒甚盛副元帥李光弼守河陽
謂李抱玉曰將軍能爲我守南城二日乎抱玉曰過
期若何光弼曰過期而救不至任棄城也賊師周摯
先攻南城將陷之抱玉乃給之曰吾糧盡明日當降
賊衆大喜斂軍以候之抱玉因得繕完設備明日堅
壁請戰賊怒欺給急攻之抱玉出奇兵表裏夾攻殺
傷甚衆摯軍退光弼自將于中潭城摯捨南城攻中
潭不勝乃整軍將攻北城光弼以兵出戰大敗之
宋夏州李繼遷遁在斤澤都巡檢曹光實選精騎襲
之繼遷僅以身免獲其母妻於是繼遷復結婚於豪

酋轉徙伏匿浸以強盛使人給光實曰我數奔北勢
窘不能自存矣公許我降乎因陳舅甥之禮期某日
於葭蘆州降光實信之且欲擅其功故不與人謀至
期繼遷設伏止領十數人近城迎光實從百騎赴之
繼遷前導北行至其地忽舉手揮鞭伏兵盡起光實
被害

秦末天下兵起沛公西入武關欲以二萬人擊秦峽
關下軍張良曰秦兵尚彊未可輕也臣聞其將屠者
子賈豎易動以利願且留壁使人先行爲五萬人具
食益張旗幟諸山之上爲疑兵令酈食其持重寶啗

秦將秦將果欲連和俱西襲咸陽沛公欲聽之良曰此獨其將欲叛士卒恐不從不從必危不如因其懈擊之沛公乃引兵擊之秦軍大敗
隋末宇文化及弑煬帝後率兵來攻李密於黎陽密知化及糧且盡爲與和以弊其衆化及弗之悟大喜恣其兵食冀密饋之會密下有人獲罪亡投化及具以密情告化及大怒其食又盡乃渡永濟渠與密戰於童山之下自辰達酉密爲流矢所中頓於汲縣化及掠汲郡北趣魏縣其將王智略等率部衆歸於密者前後相繼

唐貞元三年吐蕃結贊入寇爲李晟邀擊之又襲破其摧沙堡深恨晟及渾瑊馬遂欲陰計圖之乃卑詞厚禮告馬燧請重立盟誓則蕃軍引去德宗不許燧自入朝言之上令崔翰入蕃報結贊言還我鹽夏二州則同盟結贊曰清水之會同盟人少是以和好輕慢不成今蕃相及元帥已下凡二十一人赴盟靈州節度杜希全涇原李觀皆和善守信境外重之此時須令預盟翰約盟于清水結贊曰清水非吾地請盟於原州土梨樹盟畢則歸二州翰歸備奏其事神策將馬有麟奏曰土梨樹地多險阻恐蕃有軍隱伏不

利不如平涼其地坦平且爾涇州爲便帝從之詔報以希全只在靈州李觀又已改官今遣侍中渾瑊充盟會使崔漢衡副之鄭叔矩爲判官瑊統兵二萬又詔華州節度駱元光以本鎮兵從瑊瑊與結贊初約以兵三千列於壇之東西是時蕃軍精騎數萬列壇西結贊又請瑊以下具衣冠佩劍瑊等又幕次坦無他慮結贊伐鼓三通其衆呼譟而進瑊遽出自幕後偶得他馬跨而奔馳追騎雲合流矢雨集崔漢衡已下六十餘人皆陷於賊

退

漢劉表遣劉備北侵至鄴曹操遣夏侯惇李典拒之一朝備燒屯去惇遣諸軍追擊之典曰賊無故退疑必有伏南道窄狹草木深不可追也不聽惇等果入賊伏裏戰不利典往救備見救至乃退

魏太和三年孫權揚聲欲向合肥征東將軍滿寵禦之兗豫諸軍皆集權等退詔罷兵寵以爲今賊大舉而還非本意也此必欲僞退以罷吾兵而倒還乘虛掩不備也表不罷兵後十餘日權果再到合肥城下不克而還

東晉未妖賊孫恩北出海鹽時劉裕拒之築城於海

鹽賊日來攻城城內兵力甚弱裕深慮之乃一夜偃旗匿衆若已遁者明早開門使羸疾數人登城賊遙問劉裕所在日夜已走矣賊信之乃率兵衆大入城裕乘其懈怠奮擊大破之

後涼呂光遣將呂延伐西秦大破之乞伏乾歸泣歎曰死中求生正在今日乃縱反間稱乾歸東奔成紀呂延信之引師輕進司馬耿稚諫曰乾歸雄勇過人權畧難測破王廣尅楊定皆羸師以誘之雖葛爾小國不可輕也困獸猶鬪況乾歸乎今宜布陣而前步騎相接徐侯諸軍大集可一舉滅之延不從而戰敗

北涼主沮渠蒙遜伐西涼李歆於酒泉先攻浩疊蛇盤於帳前蒙遜笑曰前一爲騰蛇今盤在吾帳天意欲吾回師先定酒泉乃燒攻具而還次於川岳聞歆集兵欲攻張掖蒙遜曰入吾計矣但恐間吾回軍不敢前也兵事尚權乃露布西境稱得浩疊將進軍黃谷歆聞而大悅進入都瀆澗蒙遜潛軍逆之敗歆于懷城遂進尅酒泉

後魏將慕容白曜南征宋以酈範爲副師以無鹽宋將申纂憑城拒守議者僉以攻具未周不宜便進範曰輕軍遠襲深入敵境無宜淹留以失機候且纂必

以我軍來速不在攻守謂方城可憑弱卒可恃令若外潛威形內整戎旅密勵將士出其不意可以攻而尅之白曜遂潛軍偽退示以不攻一果不設備於是卽夜部分晨便騰城崇朝而克

後魏末幽州刺史劉靈助以莊帝被爾朱兆所弑遂舉兵唱義諸州豪右咸相通結靈助進屯於定州之安國魏遣將叱列延慶討之諸將謂延慶曰靈助善卜筮百姓信惑所在響應未易可圖若萬一戰有利鈍則大事去矣未若還師西入據關拒險以待其變延慶曰劉靈助庸人也天道深遠豈其所識大兵一

臨且彼皆恃其妖術坐看符厭寧旨戮力致死與吾爭勝負哉如吾計者正欲出營城外說言西歸靈助聞之必信而自寬潛軍往襲可一舉而擒乃出頓城西揚聲將還簡精騎一千夜發詰朝造靈助壘戰於北城遂破擒之

西魏末大將軍史寧與突厥木杆可汗同伐吐谷渾遂至樹敦樹敦耶吐谷渾之舊都多諸珍藏而其主先已奔賀真誠留其征南王及數千人固守寧進攻之僞退吐谷渾人果開門逐之因廻兵奪門門未及闔寧兵遂得入生擒其征南王俘虜男女財寶盡歸

諸突厥

西魏宕昌羗獠甘作亂逐其王彌定魏將史寧討破之甘將百騎走投生羗鞏廉王彌定遂得復位寧以未獲獠甘密欲圖之乃揚聲欲還甘聞之復招引叛羗依山起柵欲攻彌定寧謂諸將曰此羗入吾術中當進兵擒之耳遂進獠甘衆至與戰大破之并獲鞏廉王

隋雋州烏蠻反遣周法尚討之軍將至賊棄州城走散出谷間法尚捕不能得於是遣使慰諭假以官號僞班師日行二十里軍在舍潛遣人覘之知其首領

盡歸柵聚飲相歡法尚遣步騎數千人襲擊破之海都犯邊伯顏留拒之廷臣有譖伯顏久居北邊與海都通好無尺寸之功者詔以御史大夫玉昔帖木兒代之居伯顏于大同以俟後命玉昔帖木兒未至三驛會海都兵復至伯顏遣人語昔帖木兒曰公姑止待我翦此寇而來未晚也伯顏與海都交兵且戰且却凡七日諸將以爲怯憤曰果懼戰何不授軍於夫夫伯顏曰海都懸軍涉吾地邀之則遁誘其深入一戰可擒也諸將必欲速戰若失海都誰任其咎諸將曰請任之卽還軍擊敗之海都果脫去乃召玉革

纂輯武經 卷之四
帖木兒至軍授以印而行

詭聲

春秋時華登帥吳師以敗宋師公欲出厨人濮曰吾小人可藉死而不能送亡君請待之乃徇曰揚徽者公徒也衆從之公自揚門見之下而巡之曰國亡君死二三子之恥也豈專孤之罪也齊烏枝鳴曰用少莫如齊致死齊致死莫如去備彼多兵矣請皆用劍從之華氏北復卽之厨人濮以裳裹首而荷以走曰得華登矣遂敗華氏于新里

隋末楊玄感反攻東都刑部尚書衛文升與玄感戰兵始會玄感詐令人大呼曰官軍已得玄感矣官軍稍怠玄感與數千騎乘之文昇於是大敗

詭形

東漢袁紹將許攸降曹操因說曰袁氏輜重有萬餘騎屯軍無嚴備今以輕兵襲之不虞而至燔其積聚不過三日袁氏自敗矣操大喜選銳步騎皆用袁氏旗幟銜枚縛馬口夜從間道出人抱束薪所歷道有問者應曰袁公恐曹操掠鈔後軍還兵以益備聞者信以爲然皆自若旣至圍屯大放火營中驚亂大破之盡燔其糧穀及寶貨

後周宋楊堅輔政周大將尉遲迥在河北拒命河南
州縣多從迥堅遣將于仲文討之迥將檀讓屯成武
別將高士儒以萬人屯永昌仲文詐移書州縣曰大
軍將至可多積粟讓謂仲文未能卒至方槌牛享士
仲文知其怠選精騎襲之一日便至遂拔成武迥將
席毗羅衆十萬屯於沛縣將攻徐州其妻子在金鄉
仲文遣人詐爲毗羅使者謂金鄉城主徐善淨曰檀
讓明日午時到金鄉將宣蜀公令卽尉遲迥賞賜將
士金鄉人謂爲信然皆喜仲文簡精兵僞建迥旗幟
倍道而進善淨遙見仲文且至以爲檀讓乃出迎謁

仲文執之遂取金鄉諸將多勸屠之仲文曰此地是
毗羅起兵之所當寬其妻子其兵可自歸如卽屠之
彼望絕矣衆皆稱善於是毗羅恃衆來薄官軍仲文
皆城結陣出軍數里設伏於麻田中兩陣纔合伏兵
俱發曳柴鼓譟塵埃漲天毗羅軍大潰仲文乘之賊
皆投洙水而死水爲之不流獲檀讓檻送京師江南
悉平與呂蒙襲南郡恤關羽之衆戚屬同五代梁將
戴思遠攻德勝北城莊宗命李嗣源設伏於戚城令
騎軍挑戰梁軍大至莊宗率中軍以禦之時李從珂
僞爲梁幟奔入梁壘斧其望樓持級而還梁軍愈恐

步騎漸至李嗣源以鐵騎三千乘之梁軍大敗俘斬
二萬計

梁葛從周圍兗州兗人不出從周詐揚言并人鄆人
來救卽引軍趨高吳夜半潛却歸若朱瑾果出兵攻
外壕我軍士突出掩殺千餘人生擒都將孫漢筠
五代漢除趙暉鳳翔節度屬王景崇叛據岐山不受
代朝廷命暉統兵討之時李守正叛於蒲趙思綰據
于雍與景崇迭相爲援乃引蜀軍出大散關勢不可
遏暉數戰而勝然後塹而圍之暉屢使人挑戰賊終
不出暉乃潛使千餘人於城南一舍之外擐甲執兵

僞爲蜀兵旗幟循南山而下詐令諸軍聲言川軍至
矣景崇令數千人潰圍而出以爲應援暉設伏而待
一鼓盡殪之自是景崇膽破無復敢出明年春擒之
宋雍熙初張齊賢知代州虜騎自胡谷入寇薄城下
神尉都校馬正以所部列南門外衆寡不敵副都署
盧漢斌畏懦保壁自固張齊賢選廂軍三千出正之
右誓衆感慨一以當百虜遂却走循胡盧河南而西
先是約都部署潘美以并師來會戰無何間使爲虜
所得齊賢以師期旣漏且虞美之衆爲虜所乘俄而
美有使至云師出并州行四十里至栢井忽得密詔

東路王師劔於君子館有詔并之全軍不得出戰已
還州矣于時虜騎塞川齊賢曰虜知美之來而未知
美之退乃閉其使密室中夜發兵二萬人持一幟負
一束芻距州城西南三十里列幟燃芻虜遙見之火
光中有旗幟意謂并師至矣駭而北走齊賢先伏步
卒二千於土塔砦掩擊大敗之擒其北大王之子一
人帳前舍利一人斬數百級獲馬千餘器甲甚衆賢
歸功漢斌捷奏至太宗嘉之優詔褒美

死戰

秦末秦軍攻趙兵項羽救之引兵渡河皆沈船破釜

甑燒爐舍持三日糧以示必死無一還心於是至則
圍秦將王離九戰絕其甬道大破虜王離當是時楚
兵冠諸侯諸侯軍救鉅鹿下者十餘壁皆莫敢縱及
楚擊秦諸將皆從壁上觀楚戰士無不一當十楚兵
呼聲動天地諸侯軍無不人人惴恐

漢韓信擊趙使萬人先行出背水陣趙軍望見大笑
平明信建大將旗鼓鼓行出井陘口趙開壁擊之良
久信走水上軍皆殊死戰不可敗遂破趙軍擒趙王
歇諸將因問信曰兵法右背山陵前左水澤今者將
軍令臣者反背水陣此何術也信曰此在兵法顧諸

君不察耳兵法不曰陷之死地而後生置之亡地而後存乎且信非得素拊循士大夫此所謂驅市人而戰也其勢非置死地使人人自爲戰卽與之生地皆走寧尚得而用之乎諸將皆曰非所及也

宋武帝作相舉兵伐後秦姚泓以王鎮惡爲前鋒而鎮惡至潼關請率水軍自河入渭直至渭橋鎮惡所乘昔蒙衝小艦行船者悉在艦內沂渭而進艦外不見行船人北土素無舟楫莫不驚以爲神鎮惡旣至令將士食畢便棄船登岸渭水流急倏忽間急諸艦悉逐流去時泓屯軍在長安城猶數萬人鎮惡撫慰

士卒曰卿諸人并家在江南此是長安城北門外去家萬里而舫乘衣糧已遂流去豈復有求生之計耶惟宜死戰可立大功不然則無遺類耳乃身先士卒衆亦知無復退路莫不騰勇爭先泓衆一時奔潰卽陷長安城

梁將陳慶之守渦陽城與魏將相持自春至冬數百戰師老氣衰魏之拔兵復欲築壘於軍後諸將恐腹背受敵議退師慶之曰兵來至此涉歷一歲糜費糧仗其數極多諸軍並無鬪志皆謀退縮豈是欲立功名直聚爲鈔暴耳吾聞致兵死地乃可求生須虜圍

合然後與戰諸將壯其計從之魏人倚角作十三城
慶之銜枚夜出陷其四壘所餘九城兵甲猶盛乃陳
其俘馘鼓譟而攻魏師遂大奔潰斬獲畧盡
唐昭宗時幽州劉仁恭率軍士十萬寇魏州屠其郡
梁將葛從周自邢臺馳入魏州燕軍突之上水關攻
館陶門從周與卒五百騎出戰謂門者曰前有敵不
可返顧命闔其門從周極力死戰大敗燕人

乘勝

晉杜預襲吳樂鄉虜都督孫歡州郡皆望風歸命奉
送印綬時衆軍會議或曰百年之寇未可盡克今向

暑水潦方降疾疫將起宜候來冬更爲大舉預曰昔
燕樂毅藉濟西一戰以併強齊今王師兵威已振譬
如破竹數節之後迎刃而解也遂指授郡帥直指秣
陵所過城邑莫不束手遂平吳先議者慙而謝馬
東晉將周訪討賊杜曾曾大潰殺千餘人訪夜迢之
諸將請待明訪曰曾驍勇能戰向之敗也彼勞我逸
是以尅之宜及其衰乘之可滅鼓行而進遂以定漢
沔

十六國蜀李特攻晉將張徵徵軍潰特議欲釋徵還
涪諸將進曰徵軍速戰士卒傷殘智勇俱竭宜因其

集賢正統 卷後四 四三
弊遂擒之若舍而寬之徵養病收亡餘衆更合圖之未易也特從之復進攻徵潰圍走特遣將水陸追之遂害徵生擒徵子存以徵喪還之

唐武德初劉武周據太原使其將宋金剛屯河東太宗往征金剛遁走太宗追擊大破之乘勝逐北一日一夜行二百里轉戰十合士卒疲弊至高壁嶺總管劉弘基執馬諫曰糒糧已竭士卒疲頓願且停營待兵糧咸集而後戰太宗曰功者難成而易敗機者難得而易失金剛走到汾州衆心已沮我及其未定當乘其勢擊之此破竹之勢也如是更遲留賊必生計

此失機之道也遂策馬去諸軍乃進莫敢以饑之爲辭夜宿於雀鼠谷之兩原太宗不食二日不解甲三日軍中若饑此夕惟有一羊太宗撫將士與之同食三軍感恩皆饑而思奮明日趨汾州金剛列陣南北七里以抗官軍太宗遣總管李勣等當其北翟長孫等當其南親御大軍以臨之諸軍戰小却爲賊所乘太宗率精騎三千直趨金剛賊衆大潰遂破之太宗破薛仁果將宗羅睺於高撫乘勝率二千餘騎追之竇軌苦諫曰仁果猶據堅城雖破羅睺未可輕進請按兵以俟其變太宗曰慮之久矣破竹之勢不

可失也賊大軍已敗餘衆何足爲虞兇魁之計盡於此矣遂率衆而進至夜半軍臨賊城守埤者皆亂爭自投而下仁果窮蹙開門請降諸將奉賀因問曰始大王野戰破其將其主尚保堅城王無攻具輕騎騰逐不待步兵徑薄城下咸疑不克而竟下之何也太宗曰此以權道迫之使其計不暇發以故尅也宗羅睺恃往昔之勝兼復養銳日久見吾不出意在相輕今喜吾出悉兵來戰雖擊破之擒殺蓋少若不急躍還走投城仁果收而撫之則便未可得矣且其兵衆皆隴西人一敗退不及回顧散歸隴外則折塹自虛

我軍隨而迫之所以懼而降也此可謂成算諸君蓋不見耶諸將曰此非凡人所能及也

郭子儀擊賊將李歸仁大破之日暮僕固懷恩謂子儀曰賊必棄城走請以二百騎追之縛取李歸仁安守忠子儀曰將軍戰亦疲矣且休迨明而圖之懷恩曰歸仁守忠天下驍賊也驟勝而敗此天與我也柰何縱之不取若始得衆復爲我患雖悔無及夫戰尚速何明日爲子儀固止之令還營懷恩固請往而復返一夕而四五起遲明謀至守忠等果遁

朱泚之亂賊驍將張庭芝逼柵求戰李晟謂諸將曰

纂輯武備 卷之四
吾恐賊不出今冒死而來天贊我也勒諸將縱兵擊
之時駱元光領華州兵營在北兵少賊併力攻之晟
遣李演孟華以精卒救之中軍鼓譟演力戰大破之
殭屍滿地翌日將復出師諸將請待西軍至則左右
夾攻晟曰賊旣傷敗須乘勝撲滅若俟其有備豈王
師之利耶晟乃號令誓師畢陣於光泰門外使王似
李演率騎軍史萬頃領步卒直抵苑牆先是夜使人
開苑牆二百餘步至是賊已立木柵賊倚柵拒戰晟
叱軍士曰安得縱賊如此當先斬公等萬頃懼先登
拔柵而入王似騎軍繼進賊奔潰大軍分道並入驅

蹙至于白華忽有賊騎千餘出於官軍之皆晟以麾
下百餘騎馳入左右呼曰相公來賊聞之驚潰官軍
追斬不可勝計朱泚姚令言遁走其餘兇黨相率來
降

魏諸葛誕據壽春反魏將王基討之司馬昭欲遣諸
將輕兵深入招遞吳將唐咨等子弟因豐有蕩覆吳
之勢基諫曰昔吳將諸亮恪乘東關之勝竭江表兵
以圍新城城旣不拔而衆死者大半蜀將姜維因洮
上之利輕軍深入糧餉不繼軍覆上邽夫旣勝之後
必輕敵則慮難不深今賊新敗於外又內患未弭是

其修政設慮之時也且兵出踰年人有歸心今俘馘
十萬罪人斯得自歷代征伐未有全兵獨克如今之
盛者也昔武皇帝破袁紹於官渡自以所獲已多不
復追奔懼挫威也從之

後周武帝伐齊軍次并州齊將安德王延宗擁兵四
萬出城拒帝帝率諸軍合戰齊人退帝乘勝逐北率
千餘騎入城東門令諸軍繞城置陣至夜延宗率其
衆排車而前城中軍却人相蹂踐大爲延宗所敗死
傷略盡齊人欲閉門以間下積屍屏不得闔帝從數
騎崎嶇危嶮僅乃得出至明率諸軍更戰大破之擒

延宗并州平周武窮兵幾於不濟

狄青破儂智高智高兵敗奔邕州其下皆欲窮其窟
穴青亦不從以謂趨利乘勢入不測之城非大將事
智高因而獲免天下皆罪青不入邕州脫智高於垂
死然青之用兵主勝而已不求奇功故未常大敗計
功最多卒爲名將譬如奕棋已勝敵可止矣然猶攻
擊不已往往大敗此青之所戒也臨利而能戒乃青
之過人處

兩敵

梁司州刺史柳仲禮留其長史馬岫守安陸自率步

騎一萬寇西魏襄陽西魏將楊忠帥衆南伐攻梁隨郡克之進圍安陸仲禮聞隨郡陷恐安陸不守遂馳歸赴援諸將恐仲禮至則安陸難下請急攻之忠曰攻守勢殊未可卒拔若引日勞師表裏受敵非計也南人多習水軍不閑野戰仲禮廻師已在近路吾出其不意以奇兵襲之彼怠我奮一舉必克則安陸不攻自拔諸城可傳檄而定也於是選騎二千銜拔夜進遇仲禮於滌忠親自陷陣擒仲禮悉俘其衆安陸及竟陵郡皆降如忠所策

唐武德中太宗圍王世充於東都王充勢窮竄建德自河北來救諸將及蕭瑀等咸請且退師避之太宗不許曰世充糧盡內外離心我當不勞攻擊坐收其弊耳建德新破孟海公將驕卒惰今我據武牢扼其襟要若賊恃勝冒險爭鋒吾當破之必矣賊若不戰旬日之間世充自潰彼敗我振兵足以臨之矣一行兩定在於斯舉若不速進賊入武牢諸城新附必不能守二賊并力將若之何秦府記室薛收進曰王充據東都府庫填積所患者在於乏食是以爲我所持建德總十萬餘衆來拒王師亦當盡彼驍雄期於速戰若聽縱其至此兩寇相連轉河北之積以相資給

則伊洛間戰鬪不已大王今欲親率猛銳先據成臯之險訓兵坐甲當彼疲弊之衆一戰必尅建德破則王充自下不過數旬二國之君可面縛麾下蕭瑀等柰何遂請退兵太宗曰善而從之留齊王元吉圍王充親率三千五百人趨武牢守之不與戰相持二十餘日建德謀伺官軍芻盡牧馬於河北將襲武牢太宗聞之遂牧馬千餘匹於河渚間以誘之詰朝建德果悉衆而至陣於泥水東太宗候其陣久卒餓令宇文士及率騎經賊陣之西馳而南上賊陣動因而諸軍奮擊之大潰竟如太宗本冊

退據

隋末唐高祖義師發太原次靈石縣賈胡堡隋將宋老生率精兵二萬屯霍邑以拒之會久雨糧盡與長史裴寂及諸將議曰宋老生頓霍邑屈突通鎮河東二人同心非造次可進欲且還太原以圖後舉太宗曰本興大義以救蒼生當須先入咸陽號令天下今遇小敵便卽班師將恐義徒一朝解體還守太原一城之地此爲賊爾何以自全高祖乃止太宗引師赴霍邑遂平老生

武后初徐敬業舉兵於江都稱匡復皇家以蓋屋尉

魏思溫爲謀主問計於思溫對曰明公旣以太后幽
蓋少主志在匡復兵貴拙速但宜早度淮北親率大
衆直入東都山東將士知公有勤王之舉必以死從
此則指日刻期天下必定敬業將從其策薛瑋又說
曰金陵之地王氣已見宜早應之兼有大江設險足
可以自固請且攻取常潤等州以爲王霸之業然後
率兵北上鼓行而前此則退有所歸進無不利實爲
良算也敬業以爲然乃自率兵四千入南度以擊潤
州思溫密謂杜求仁曰兵勢宜合不可分今敬業不
知并力度淮率山東之衆以取洛陽是必無能成事

已可知敬業尋已悔之所以遂敗

苦戰

春秋時晉師伐齊陣于鞏晉解張御郤克鄭丘緩爲
右及戰郤克傷於矢流血及屨未絕鼓音曰余病矣
張侯曰自始合而矢貫余手及肘余折以御左輪朱
殷豈敢言病吾子忍之緩曰自始合苟有險余必下
推車子豈識之然子病矣張侯曰師之耳目在吾旗
鼓進退從之此車一人殿之可以集事若之何其病
以敗君之大事也擐甲執兵固卽死也病未及死吾
子勉之左并轡右援抱而鼓馬逸不能止師從之齊

師敗績逐之三周華不注

晉劉裕率兵伐後秦姚泓後魏遣將鷲青等步騎十萬屯河北常有數千騎緣河隨晉軍進止時晉軍人緣河南岸牽百丈河流迅急有漂度北岸者輒爲魏人所殺掠遣軍纔過岸卽退軍還復來裕乃遣白直隊主丁旡率七百人車七百乘於河北岸上去水百餘步爲却月陣兩頭抱河車置弓弩畢使立一白眊魏人初不解其意并未動裕先命將朱超石戒嚴二千人白眊旣舉超石馳往赴之齋大弩百張一車益二十人設柵排於轅魏人見營陣乃進圍營超石先

以軟弓小箭射之魏軍四面俱走攻營於是百弩俱發又遣善射者叢射之魏衆旣多弩不能制超石初行別齋大鎚并千餘張稍乃斷稍長三四尺以鎚鎚之一稍輒洞貫三四人魏衆不能當遂奔潰

梁武帝遣曹仲宗等攻魏渦陽又以韋放爲明威將軍總兵會之魏大將費穆帥衆掩至放軍營未立麾下止有二三百餘人放從弟洵驍果有勇力單騎擊刺屢折魏軍洵馬亦被傷不能進放胄又三貫矢衆失色請放突去放厲聲叱之曰今日惟有死耳乃免胄下馬據胡牀處分士卒皆殊死戰莫不一當百逐北

大破之諸營壘一時奔潰

敗

晉末河間王顥在關中遣將張方討長沙王又方率眾屯河南又遣左將軍皇甫商拒之而敗張方率兵入洛陽又奉惠帝討方于城內方軍遙見乘輿於是引退止之不得眾遂大敗方退壁於十二里橋人情挫衄無復固志或勸方夜遁方曰兵之利鈍無常貴因敗以爲成功耳我更前作壘出其不意此用兵之奇也乃夜潛進逼洛陽城七里又又新捷不以爲意忽聞方壘成又師乃出戰遂大敗

東晉將周訪討江沔間賊杜曾訪有眾八千進至沌陽曾銳氣甚盛訪曰先人有奪人之心善謀也使將軍李恒督左甄許朝督右甄訪自領中軍高張旗幟曾果先攻左右甄曾勇冠三軍訪甚惡之自於陣後射雉以安眾心令小將趙胤領其父餘兵屬左甄力戰敗而復合胤馳馬告急訪怒叱令更進胤號哭還戰自辰至申兩甄皆敗訪選精銳八百人自行酒飲之勅不得輕動聞鼓音乃進賊未至三十步訪親鳴鼓將士皆騰躍奔走曾遂大潰殺千餘人遂定漢沔隋末高祖起兵自太原至霍邑隋將宋老生守城太

纂輯正統 卷後四
宗以數騎詰其城下舉鞭指麾若將圍城之狀且詬
之老生怒引兵三萬自東門南門分道而出高祖謂
建成曰汝看兩陣將交引左軍直趨東門命太宗引
右軍直趨南門以斷其歸路老生之軍背城而列陣
高祖以中軍與建成合陣城東太宗陣於城南老生
麾兵疾進先薄高祖而建成墜馬老生乘之中軍與
左軍咸却太宗自南源遙見塵起知義師退率二百
騎馳下峻坂殺一賊將遂衝斷其軍出其陣後表裏
齊譟隋師大潰遂擒老生而平霍邑

隋末稽胡五萬餘人掠宜春竇軌討之與賊相遇賊
乘高縱火王師稍却軌斬其部將二十四人拔隊中
小帥以代之勒兵復戰軌自率百騎殿於軍後令之
曰聞鼓聲不進者自後斬之旣而鼓之士卒爭赴敵
賊射之不能止因大破之

隋突厥沙鉢略可汗寇掠而南詔以達奚長儒爲行
軍總管擊之遇於周槃衆寡不敵軍中大懼長儒慷
慨神色愈烈爲虜所衝突散而復聚四面抗拒轉鬪
三日晝夜凡十四戰五兵咸盡士卒以拳毆之手皆
見骨殺傷萬計虜氣稍奪於是解去突厥本欲大掠
秦隴旣逢長儒共皆力戰虜意大沮明日於戰處焚

屍慟哭而去

後晉開運中契丹擁衆南向約八萬餘騎晉將杜重威懼退保州契丹踵之晉軍至陽城契丹大至晉軍與戰逐北十餘里契丹踰白溝而去晉軍結陣而南胡騎四合如山諸軍力戰拒之是日纔行十餘里人馬饑乏晉軍至白圍衛村埋鹿角爲行寨契丹圍之數重奇兵出寨後斷糧道是夕東北風大起破屋折樹營中掘井方尺水輒崩士卒取其泥帛絞而飲之人馬俱渴至曙風尤甚時晉師居下風將陣弓弩無所施符彥卿曰與其束手就擒曷若以身殉國乃與

張彥澤等引精騎出西門擊之諸將繼至契丹却數百步彥卿等擁萬餘騎橫擊契丹呼聲動天地契丹大敗而走勢如崩山李守真亦令步兵盡拔鹿角出鬪步騎俱進逐北二十餘里鐵鷄旣下馬蒼皇不能復上皆委棄馬及鎧仗蔽地杜威曰賊已破膽不宜更令成列遣精騎擊之皆沒水去

耿全斌從征太原還遇虜于滿陰追擊至徐河因據水口要害遷補騎副兵馬使又改雲騎軍使屯瀛州與虜戰所乘馬雨中流矢死凡易三乘戰不却賊爲引去

宋吳玠守秦隴金兀朮會諸道兵十餘萬造浮梁跨渭自寶雞結連珠營壘石爲城夾澗與官軍相拒攻和尚原玠命諸將選勁弓強弩分番迭射號駐隊矢連發不絕繁如雨注敵稍却則以奇兵旁擊絕其糧道度其困且走設伏於神岔以待金兵至伏發衆大亂縱兵夜擊大敗之兀朮中流矢僅以身免亟剃其鬚髯而遁胡世將問玠所以制勝者於玠弟璘璘曰璘從先兄有事西夏每戰不過一進却之頃勝負輒分至金人則更進迭退忍耐堅久令酷而下必死每戰非累日不決勝不遽追敗不至亂蓋自昔用兵所

未嘗見與之角逐滋久乃得其情蓋金人弓矢不若中國之勁利中國士卒不及金人之堅耐吾長以長技洞重甲於數百步外則其衝突固不能相及於是選據形便出銳卒更迭撓之與之爲無窮使不得休暇以沮其堅忍之勢至決機於兩陣之間則璘有不能言者方富平之敗秦鳳皆陷金人一意睨蜀東南之勢亦急微玠身當其衝無蜀久矣故西人至今思之

攻必救

春秋時楚子及諸侯圍宋宋公孫固如晉告急先軫

曰報施救患取威定霸于是乎在矣狐偃曰楚始得曹而新婚于衛若伐曹衛楚必救之則齊宋免矣宋人使門戶般如晉師告急公曰宋人告急舍之則絕告楚不許我欲戰矣秦齊未可若之何先軫曰使宋舍我而賂齊秦藉之告楚我執曹君而分曹衛之田以賜宋人楚愛曹衛必不許也嘉賂怒頑能無戰乎公說執曹伯而分曹衛之田以界宋人遂與楚人戰大敗之

掩巢

魏伐趙趙請救于齊田忌引兵救趙孫臏曰夫解雜亂紛糾者不控捲救鬪者不搏櫜批吭擣虛形格勢禁則自爲解耳今魏趙相攻輕兵銳卒必竭于外老弱罷于內君不若引兵疾走大梁據其街路衝其方虛彼必釋趙而自救是我一舉解趙之圍而半弊于魏也田忌從之直走大梁魏師遂退

魏武征河北師次頓丘黑山賊于毒等攻東武陽魏武引兵入西山攻毒等本屯毒聞之棄東陽還魏武要邀于內黃大破之

司馬懿征公孫淵淵遣步騎數萬阻遼隧拒懿懿盛兵南出賊盡赴之乃泛舟潛濟以出其北傍水作長

圍忽棄賊而向襄平諸將言不攻賊而作圍非所以示衆也懿曰賊堅營高壘欲以老吾兵也攻之正入其計此王邑所以恥過昆陽也古人言敵雖高壘不得不與我戰者攻其所必救也賊大衆在此巢窟虛矣我直指襄平必人懷內懼懼而求戰破之必矣遂整陣而過賊見兵出其後果邀之懿因謂諸將曰所以不攻其營正欲致此不可失也乃縱兵逆擊大破之三戰皆捷

王莽末光武起兵據昆陽城時唯有八九千人莽遣將王邑嚴尤討之軍到城下者且十萬光武留王鳳等守城與李軼等十餘騎夜出既至鄧定陵悉發諸營兵嚴尤說王邑曰昆陽城小而堅今假號者在宛亟進大兵彼必奔走則昆陽自服邑曰吾昔以虎牙將軍圍翟義坐不生得以見責今將百萬之衆遇城而不能下何謂耶遂圍之數十里列營百所雲車十餘暇臨城中旗幟蔽野埃塵連天鉦鼓之聲聞數十里或爲地道或衝輜撞城積弩亂發矢下如雨城中負楯而沒王鳳等乞降不許光武遂與諸營部俱進自將步騎一餘前去大軍四五里而陣尋邑亦遣兵數千合戰光武奔之斬首數十級諸部喜曰劉將軍

平生見小敵怯今見大敵勇甚可怪也且復居前請助將軍光武復進尋邑兵却諸部兵乘之斬首數百千級連勝遂前因大敗之王邑違先攻宛所以也敗東晉將蘇峻反攻克石頭城據之晉將陶侃溫嶠率兵討之諸將請于查浦築壘監軍鄧岳曰查浦地下又在水南唯白石峻極險固可容數千人賊來攻不便戮賊之術也侃從之夜立壘訖賊見壘大驚賊攻大葉侃將救之長史殷羨曰若大葉步戰不如峻則大事去矣但當急攻石頭峻必救之而大葉自解侃又從羨言峻果棄大葉而救石頭諸軍與峻戰東陵

侃督部將斬峻於陣賊衆遂潰

王世充與李密相持於東都世充夜度陣于洛水之北其時密已渡洛水陳兵與世充相對東接月城西至石窟密多騎兵長槍宜平寬放縱世充多步兵戈矛耕攢宜隘險然南逼洛水北阻太山地形褊促騎不成列世充縱耕攢蹙之密軍失利密與數子登船南濟自餘兵馬皆東走月城世充乘勝長驅直至月城下密既渡南岸卽策馬西上直向世充本營左右麾旗相繼而至世充營內見密兵來逼急連舉六烽世充乃捨月城之圍收兵西退自洛北達于黑石中

間四十餘里奔赴顛獮大喪師徒密之行也東北之圍不救而自解西南之寇不戰而成功世充伏其權奇不復輕出

太宗討竇建德入武牢進三其營多所傷殺凌敬進說曰宜悉兵濟河攻破懷州河陽使重將居守更率衆鳴鼓建旗踰太行入上黨先聲後實傳檄而定折趣壺口稍駭蒲津收河東之地此策之上也行必有三利一則入無人之境師有萬全二則拓土得兵三則鄭圍自解建德將從之而世充之使長孫安世陰齎金玉啗其諸將以亂其謀衆咸進諫曰凌敬書生

耳豈可與言戰乎建德從之退而謝敬曰今衆心甚銳此天贊我耳因此決戰必將大捷已依衆議不得從公言也敬固爭建德怒扶出于是悉衆進逼武牢官軍案甲挫其銳建德中槍竄于牛渚口唐軍生獲之

光武東圍鉅鹿王郎守將王饒堅守月餘不下連攻不克耿純曰久守鉅鹿士卒疲敝不如及大兵精銳進攻邯鄲若王郎已誅鉅鹿不戰自服矣從之乃留軍守鉅鹿進軍邯鄲連戰破之郎少傅李立開門納漢兵遂拔邯鄲

後漢將軍耿秉與竇固合兵一萬四千騎擊車師有
後王前王前王卽後王之子其庭相去五百餘里秉
議先赴後王以爲併力取根本則前王自服固計未
決秉奮身上馬衆軍不得已遂進并縱兵抄掠斬首
數千級牛馬羊十餘萬頭後王安得震怖將數百騎
出迎秉降

袁紹曹操相持于官渡沮授說紹遣騎將別爲支軍
於外以絕曹操之援紹不從許攸進曰曹操兵少而
悉師拒我許下餘守勢必空弱若分遣輕軍星夜襲
許操爲我擒如其未潰可令首尾奔命破之必也紹
又不用竟爲曹操所敗

魏文帝問司馬懿曰吳蜀宜討何者爲先對曰吳以
中國不習水戰故散居東關且攻敵扼其喉搥其心
夏口東關賊之心喉若爲陸軍以向皖城引權軍東
下爲水軍向夏口乘其虛而擊之此神兵從天而下
破之必矣

東魏大將高歡率兵伐西魏濟河集諸將議進趣之
計斛律羨舉曰宇文黑獺雖聚凶黨彊弱可知今固
守無糧援可恃有同困獸若不與其戰而徑趣長安
長安空虛可不戰而尅拔其根本彼無所歸則黑獺

之首懸於軍門矣諸將議有異同遂戰于渭曲大敗而歸

隋趙煚於江南岸置安蜀城以禦陳屬霖雨數旬城頽者百餘步蠻酋鄭南鄉叛引陳將吳明徹欲掩安蜀議者皆勸煚益修守禦煚不從乃遣使說誘江外生蠻向武陽令乘虛掩襲南鄉所居獲其父母妻子南鄉聞之其黨各散陳兵亦遁

秦末沛公略南陽郡守宋齕走俱城守宛沛公引兵過而西張良諫曰沛公雖欲急入關秦兵尚衆拒險今不下宛宛從後擊強秦在前此危道也於是沛公

乃夜引軍從他道還更旗幟黎明圍宛城三匝南陽守欲自剄其舍人陳恢曰死未晚也乃踰城見沛公曰臣聞足下約先入咸陽者王之今足下留守宛宛大都也連城數十人民衆積蓄多吏人自以爲降必死故皆堅守乘城今足下盡日止攻士死傷者必多引兵去宛必隨足下後足下前則失咸陽之約後又有強宛之患爲足下計莫若約降封其守因使止守引其甲卒與之西諸城未下者聞聲爭開門而待足下矣沛公曰善乃以宛守爲殷侯封陳恢千戶引兵而西無不下者

蕭齊末梁武帝自襄陽率兵東下至郢州攻未拔蕭
穎胄在江陵遣衛尉席闡文勞軍因謂梁武曰今頓
兵兩岸不併軍圍郢定西陽武昌取江州此機已失
莫若請救於魏與北連和猶爲上策梁武謂闡文曰
漢口路通荆雍控引秦梁糧道資儲聽此氣息兵若
前進魯山必阻沔路所謂扼喉若糧儲不通自然離
大憊謂持久鄧元起近欲以三千兵往定潯陽彼若
曰然悟機一酈生亦足脫拒我師固非三千能下四
陽武昌取便得耳得便應鎮守守兩城不滅萬人糧
儲稱是卒無所出東君有上者萬人攻一城兩城勢

不能相救若我分軍應援則首尾俱弱如其不遣孤
城必陷一城旣沒諸城相次土崩天下大事於是去
矣若郢州旣拔席卷沿流西陽武昌自然風靡何遽
分兵散衆自貽其憂且丈夫舉動欲清天步况擁七
州之兵以誅羣豎懸河注火奚有不滅豈有北面請
救以自示弱彼未必能信徒貽我醜聲此之下計何
謂上策及拔郢城向下城戍無不風靡遂尅建業

武德中李靖隨河間王孝恭討輔公祏公祏遣將馮
惠亮率舟師三萬屯當塗陳正通領步騎二萬屯青
林山仍于梁山連鐵鎖以斷江路築却月城延袤十

餘里與惠亮爲犄角之勢孝恭集諸將議皆云惠亮
正通并握強兵不戰之計城柵旣固卒不可攻請直
指丹陽掩其巢穴丹陽旣破惠亮自降孝恭欲從其
議靖曰公柘精銳旣在水陸二軍然其自統之兵亦
皆勁勇惠亮等城柵尚不可攻公柘旣保石頭豈應
易拔若我師至丹陽留停旬月進則公柘未平退則
惠亮爲患此便腹背受敵恐非萬全之計惠亮正通
皆是百戰餘賊必不憚于野戰止爲公柘立計令其
持重但欲不戰以老我師今若攻其城柵乃是出其
不意滅賊之機惟在此舉孝恭然之靖乃先擊惠亮

苦戰破之殺傷及溺死者萬餘人惠亮奔走靖率輕
騎先至丹陽公柘大懼先遣僞將左遊仙領兵守會
稽以爲聲援公柘擁兵東走以趨遊仙至吳郡與惠
亮正通并相次擒獲江南悉平

後周時詔發關中兵以韋孝寬爲元帥東討尉遲迥
軍次河陽迥所置儀同薛公禮等圍偃懷州遣兵擊
破之進次懷縣永橋城之東南其城旣在要衝雉堞
牢固迥已遣兵據之諸將士以此城當路請先攻取
孝寬曰城小而固若攻而不拔損我兵威今破其大
軍此亦何能爲也于是引軍次于武陟因大破迥子


惇惇輕騎奔鄴迥自出戰又破之迥窮迫自殺

唐武德初宇文文化及據聊城淮安王神通進兵躡之
秘書丞魏徵謂神通曰文化及據聊城萃人為其固守
若至莘即宜攻取但拔莘縣聊城益懼因而逼之易
同俯拾須以攻具自隨一足威敵二不之用不然兵
至莘城見無攻具不下如不能尅莘而遠追化及恐
亦無功則化及非旬月可獲莘人阻我糧運化及為
之外援恐非計之善者神通不從軍次莘果不下而
退散

堅壁

春秋時秦為令狐之役故秦伯伐晉晉趙盾禦之以
從秦師于河曲史駢曰秦不能久請深壘固軍以待
之從之秦人欲戰秦伯謂士會曰若何而戰對曰趙
氏新出其屬曰史駢必實為此謀將以老我師也趙
有側室曰穿晉君之壻也有寵而弱不在軍事好勇
而狂且惡史駢之佐上軍也若使輕者肆焉其可乃
皆出戰交綏而退

蜀大將諸葛亮悉大眾十萬由斜谷出始平據武功
五丈原魏將司馬懿帥師拒之與亮對于渭南懿固
壘不戰亮分兵屯田為久駐之基屢使交書及致巾



惘以怒懿懿亦屢表請戰魏使衛尉辛毗杖節而到諸將皆曰賊不復出矣亮曰彼本無戰心所以固請者示武于衆耳將在軍君命有所不受苟能制吾豈千里請戰耶懿使二千人餘就營東南角大聲稱萬歲亮使問之答曰吳朝有使至請降亮謂曰計吳朝必無降法卿是六十老翁何煩詭誑如此懿與亮相持百餘日亮卒于軍中及軍退懿乃行營壘曰天下奇才也

摧標

秦姚萇與苻登相持未解登將魏揭飛率氏胡數萬


人攻杏城雷惡地應之攻李潤萇議將討之羣臣咸曰陛下不憂六十里苻登乃憂六百里揭飛萇曰登非可卒殄吾城亦非登所能卒圖惡地多智非常人也南引揭飛東結董成甘言美說以成姦謀若得杏城李潤惡地據之控制遠近相爲羽翼長安東北非復吾有于是潛軍赴之萇時衆不滿二千揭飛惡地衆至數萬氏胡赴之首尾不絕萇每一見軍至輒有喜色羣下怪而問之曰今同惡相濟皆來會集吾得乘勢席卷一舉而覆其巢穴東北無復餘也揭飛等以萇兵少盡衆來攻萇固壘不戰示之以弱潛遣子

崇率騎數百出其不意以乘其後揭飛兵擾亂莫遣步騎擊之揭飛衆大潰斬掛飛惡地請降

東魏丞相高歡自將率兵伐西魏屯軍蒲坂造三道浮橋渡河又遣其將竇泰趨潼關高敖曹圍洛州西魏將宇文泰出軍廣陽召諸將謂曰賊今圍吾三面又造橋于河示欲必渡欲綴吾軍使竇泰得西入耳久與相持其計得行非良策也且高歡用兵常以泰爲先驅其下多銳卒屢勝而驕今出其不意襲之必克克泰則歡不戰而自走矣諸將咸曰賊今再近捨而遠襲事若差跌悔將何及也泰曰歡前在襲潼關

吾軍不過霸上今者大來兵未出郊賊顧謂吾但自守耳無遠鬪意又丑于得志有輕我心乘此擊之何往不尅賊雖造橋未能徑至此五日中吾取竇泰必矣幸公等勿疑泰遂率騎六千還長安聲言欲往隴右旣而潛軍東出晨興至小關竇泰卒聞軍至惶懼依山爲陣未及成列泰乃縱一擊破之斬泰傳首長安高敖曹適陷洛州聞泰死焚輜重棄城走歡亦撤橋而退宇文泰初與諸將謀咸難之泰乃隱其事佯若未有謀者而獨問策于尚書直事郎中宇文深對曰竇泰歡之驍將也亟勝而輕敵今者大軍若就蒲

坂則高歡拒守竇泰援之內外受敵取敗之道也不
 如選輕銳之卒潛出小關泰性躁急必來決戰高歡
 持重未即救之則竇泰可擒也既擒竇泰歡勢自沮
 迴軍禦之可以制勝泰喜曰是吾心也君即吾之陳
 平也



唐荆川先生纂輯武編卷後四終

